

U CUNTE DE Z' PEPPE

Na séra tatone raccuntatte nu cuntariélle che l'avèa fatte ze Pèppe, nu pecurare de la Rocca.

'ccusì ricèa ze Peppe:

Tutte sanne ca qua da nu' le vernate so' tremènde, ma ce ne fu una tanta tiémpe fa ca facètte tanta 'é chélla néva ca murènne nu sacche 'é gènte pe ru fridde.

Štèa a Bujane na famiglia puurèlla che nne tenèa niènte ra magnà.

Allora la mamma chiamatte a u cchiù gruosse de le criature u mannatte da na canuscènte a cercà nu poche 'é pane.

U 'uaglione, maleveštite, scètte da la casa, ma pe la vija a causa d'u fridde e de la buféra svenètte e rumanètte suffucate.

Tutta la famiglia aspettave u ritorne d'u 'uaglione pe ze magnà nu muccechille, ma u 'uaglione nne turnave.

Fattese tarde, ze 'ncumènzanne a préoccupà, allora la mamma scètte pe veré' che fin'avèa fatte 'štu 'uaglione, ma fatte poca štrara verètte 'scì da nu mucchie 'é néve nu piéruce: nu colpe le pigliatte facènnela rumané' sènza sciate... Ze chiécatte e che le mane scuprètte 'llu curpeciélle e recanu- scètte u ninne suo'!

Allora ze méttètte alluccà cumm'a na pazza; raccugliètte u curpeciélle e u purtatte rénta a la casa e llà rrènte 'nte raconte che štrazie pe chélla famiglia! La mamma chiagnèa juorne e notte, una cuntinuazione.

Doppe poca juorne, pe 'nze fa veré' dall'autè criature, ze ne jva a chiagne appiére a na roccia che štèa vicine a la casa. N' nze putèa perdunà d'avè' mannate u criature 'n gire a u pošte suo'!

Chiagnèa, chiagnèa sempe, la povera fémmena. Tanta lacreme jettava ca nu bèlle juorne ze bucatte la roccia sott'a le piére suo' e scètte da llà nu cape r'acqua.

Le lacreme ammišchiate a l'acqua sciuta da la roccia reventanne nu sciume sèmpè cchiù gruosse ca arrevatte fine a u mare.

Quille sciume la gènte 'e Bujane u mettètte nome Bufierne, forse pe recurdarze d'u criature muorte sott'a la buféra e u pošte addò štèa la roccia Cape d' acqua.